

廣德州志

卷四十九之卷五十一



廣德州志卷四十九

藝文志

表疏二

諭禁

碑記三

雜著

詩

書目

載筆載言體例稍殊其爲徵實一也凡關繫是郡利害政典之大而其言足不朽者如真西山之賑荒錢君倚洪慶善周翠渠鄒東廓之勸學之類雖勒之金版可也萬厯楊門等志錄而未備李志繁蕪舛亂猶矢志之本意今於發揮山水紀敘年月之作旣擇其尤雅分附諸門茲復取斯誦斯傳者彙而錄之各以事類故年次有所不拘也至名賢題詠亦必其與人地有涉或殘山剩

廣德州志

卷四十九

表疏

一

水可藉以見者方爲登載善讀者自知之

表疏 一

撫綏化導長吏職也布大澤除大害則必待命於朝廷表疏所以達下情而宣德意其人其言蓋有非偶然者宋時知軍例得拜章而嘉定旱饑魏峴不言賑濟而劾林庠使時無真文忠州民十萬戶有子遺乎此布澤之說也馬政漕糧數者皆郡大害今之蒙樂利者又誰之力與然諸公當事勢之窮竭誠哀籲爲之者勞而生其際者亦瘁觀錢君倚謝表忠愛之意

自然流出興學設教不問而知其爲循良此時之吏  
與民抑何幸也茲取以弁首讀其文可識其用心焉

廣德軍謝上表

宋 錢公輔

曠官罪大奪位秩者彌年享帝恩隆回雷霆於數日籍還  
省部身忝軍牙祇荷寵靈伏深感懼伏念臣江湖賤士巖  
穴孤生出逢聖辰升備法從學非深造粗能明致治之方  
心不苟容姑欲罄事君之節義當有在雖富貴誘之而不  
回職所宜言雖斧鉞威之而益厲果由官守遂正典刑放  
之窮山所以苦其心志授之散秩將以餓其體膚期沒齒

廣德州志

卷四十九

表疏

二

於蒿萊敢希榮於軒冕豈徒寬宥尚被采收死灰誰謂乎  
復然白骨安知乎再肉便鄉守壘上冢還家百計安閒一  
身安逸使其自請未必能然此蓋伏遇陛下化極文明恩  
漸動植如天之覆遠則彌周如日之中幽無不燭遂容鷲  
質猥玷鴻私况是桐川獨居江左俗雖僻陋而稱風物之  
良地雖褊迫而有山林之勝養茲不肖孰曰匪宜惟修省  
所以飭躬惟忠勤所以報國有民有社固恪奉於訓詞爲  
子爲臣方益堅於素節誓殫犬馬仰答龍光

呂祖謙宋  
朝文鑑

奏乞蠲閣夏稅秋苗

六月一日  
在嘉定八年

案此  
下同

真德秀

竊見本路州縣今歲以來雨澤闕少自三月至於五月之終九旬之間有雨者六七日焦熬之狀蓋不待言播殖之功一切盡廢訪問建康太平甯國池徽南康廣德諸郡旱勢略同諸州米價漸已日增父老皆言稷稻雖已失時尙堪雜種麻豆蕎麥黃粟之屬但今秋成失望小大憂危而官司催督夏稅略不少貸典賣罄竭不足以償凡曰陸種僅可救饑近年官司往往不恤每遇檢放指爲熟田責令輸納苗米所以更相懲創而不敢種臣聞此語爲之惻然竊惟今歲之旱實與往年不同往年之旱多在夏秋田間

既已布種故雖災傷之甚什至七八而其熟處猶有二三今則高下之田皆爲荒地借令雨以時至雜種可投尙恐空於蝗螟之口而况雨未可期種未可必方來之患日月尙長民情搖搖已有流移之漸臣近準朝旨將來合議糶濟卽與本路諸司同共詳議措置施行臣已恭稟多方講究外竊謂與其待已饑而行糶濟之患不若先未饑而加存恤之恩謹具奏請事件如左

其一曰倚閣夏稅伏望聖慈速降指揮將本路州縣旱乾不曾種蒔去處第四第五等人戶夏稅權與倚閣候

將來得熟日併催庶幾稍解倒垂之急其二曰蠲放秋苗臣謂今欲慰安人情使無逃徙莫若控告朝廷先期降旨約敕州縣應本路官私田畝久旱不曾種蒔去處並與全放秋苗其雜種麻豆之屬並不許指作熟田責令輸納苗米以致重困許臣備坐指揮散榜曉諭庶幾農人安心不至狼顧實一道幸甚

真西山文集下  
同 此係節錄

乞倚閣本路八州軍第四第五等人戶秋苗

江東路安撫轉運使司狀照對江東一路旱蝗爲災除信州成熟外其餘州軍府嘉定七年苗米畸零欠數不多民

廣德州志

卷四十九

表疏

四

正艱食豈堪催科煎迫之苦必無輸納徒費鞭笞今流移已多或緣逃避追呼不議蠲除則來歲耕夫必少所失經賦反多於零欠公朝厚下於民固無所靳况權事體輕重較然甚明欲望朝廷將七年分人戶零苗特與除放是亦賑荒之一助伏候指揮八月二十九日奉聖旨令建康甯國府太平徽饒池州南康廣德軍將嘉定七年第四第五等人戶見欠苗米權與倚閣仍分明出榜曉諭

奏乞撥米賑濟

同安撫司總領所  
在嘉定八年七月間上案此

伏見自冬徂春雨澤稀少八夏以來亢陽彌甚陛下嚴恭

天命憂念元元延讜言赦死辜釋遷謫還沒產苟可銷鑿致和無所愛惜臣等布宣無狀所部九郡而建康太平甯國徽池廣德南康七郡迄今不雨旱勢已成間得沾濡炎天毒烈士脈乾燥耕種不入赤地相望稍有近水可插秧苗去處飛蝗所過靡有子遺今方六月城市閉糴米價騰踊民食已艱村落之間必有餓莩向秋以後損瘠又多累據諸處人戶陳訴并州縣備申旱荒之狀有不忍聞今年災旱不同常歲本道旱勢又甚他路國之根本在此江東丁時外虞尤欲安靜惟有速發見藏不吝重費臣等已行

廣德州志

卷四十九

表疏

五

下州縣分遣官僚躬親抄劄畧計七郡所當濟者不下百餘萬戶戶給一石亦該一百餘萬石所在州縣匱乏豈有寬餘而義倉見管纔四十三萬耗腐在內非陛下捐數十萬石之米不足以賑此凶災陛下禱旱之初不愛曠典異恩以銷天變蘇民瘼今赤子罄罄赴愬求延旦夕之命必不惜力靳費不以揀之臣等謹體聖懷昧死上奏伏望斷自宸衷亟命有司於鎮江建康府轉般倉撥米五十萬石貼助本路義倉米斛賑濟飢民如部內諸州有請卽下臣等分撥陛下幸賜江東之民而臣等不能檢柅吏姦失陷

官物致上孤德意下誤民生則臣等之罪惟陛下照之嘉准

定八年七月十九日省劄照得已降指揮給降度牒云云七月十九日奉聖旨令建康轉般倉支撥米三十萬石貼充江東路濟糶使用專令江淮制置司契勘本路所部州縣災傷輕重將今來所撥米并提舉司常平義倉米及用度牒收糶米并制置司所糶米并為總數卻與斟酌分撥下各州軍應付濟糶使用仍行分管監司將撥定米斛督責州縣措置賑恤其已撥付轉般倉上供綱米如米未曾支裝運即仰合得米州郡即依分定數就行截留使用及就近支撥應付鄰近州縣合得米仍仰制置司限五日先具已均撥米數申尚書省劄付本司此係節錄

巾尚書省乞截撥甯國府等上供米同時

某昨以江東七郡旱災事體至重輒同本道帥臣監司奏乞鎮江建康轉般倉米五十萬石貼助義倉見米以掄一

廣德州志

卷四十九 表疏

六

路之民國家憂民如子必已允俞某職在轉輸昨蒙朝廷令本司催督甯國府等處米二十七萬九千石赴建康轉般倉交納據各郡申除災傷檢放外一十四萬六千餘石並未起發竊惟諸州皆係合賑濟去處欲各畱上件米在州免令起發候指揮降到米斛理豁建康府轉般倉內合科撥之數庶得朝廷恩意速可及民不致稽緩誤事又免兩次往來水腳費折誠為至便謹具申尚書省伏乞檢照前申及今來所申事理早賜施行此係節錄

小貼子照得廣德軍地素饒瘠豐年人且狼狽一遭旱

歉窮因可知兼水路不通米運益艱雖有科撥米斛亦難遽至竊聞本軍已具申乞截畱淮東西總領所米斛二萬八千餘石若蒙朝廷從所申卽賜施行庶得涸郡窮民早被實賜又兼照本路諸州常平義倉見管米僅四十三萬石若蒙朝廷俯從近日所請撥賜鎮江建康轉般倉米五十萬石兩項通計九十三萬石而本路七州合濟之戶約百餘萬不過戶得一石而合賑糶人戶尙不在此數內況目今米價踊貴民間大段艱食便合舉行賑糶而所在州縣旣無見管之米又無錢可以收

糶爲賑糶之用緣此富民觀望爭事閉糶商賈闕伺愈索高價而合賑糶人戶久食貴米轉見狼狽將來必至盡仰賑濟爲公家之費愈多若官場有米接續出糶則富家之米自出商販之米自至而人戶之力亦得少紓將來不至全仰官司賑濟則公家之費所省必多公私兼利無出於此竊見淳熙乙未劉樞密知建康日措置揀荒曾申朝廷借撥椿積錢糶米出糶民甚賴之其後結局仍將糶到米錢歸還元借窠名一無虧欠它如此比不可勝舉目今本路除建康府有椿積錢外其餘州

郡亦皆有交割錢之類平日謹藏府庫不敢擅動然在今日民病已急若許各州權行兌借作循環糶糶之本將來結局本司自當專一督察令其盡數歸還於公初無所損而於民實受大利併望朝廷特賜指揮

奏乞分州措置荒政等事

同總領提舉七月上

伏見今歲江東九郡大旱者七加以飛蝗所過遺孽蔽江盈野其積數尺草木蘆葦爲之一空秋陽方驕風日愈烈耳目所接無非焦熬窘促之狀人情皇皇畧無生意井泉溝澗在在枯竭居民行旅汲飲無所市糶翔踊斗幾千錢

廣德州志

卷四十九

表疏

八

其長未已居民相謂以平時三數日之資爲一日糶猶不能飽至於村疇鎮戍市無粒米道路往來有連日不得食者若不急爲措置則弱者轉於溝壑强者聚爲盜賊皆將上貽宵旰之憂臣等並將使指親見生靈危急若此寢食爲之不遑昨已具奏乞撥降米斛借兌官錢措置濟糶外續會議到合施行事宜如後

凡四條今節錄第一條

一部內九郡監司所當通察至於措置提督則當各以附近州縣分任其責凡所施行仍舊互相關報蓋通察而不分任則耳目難周報應稽緩分任而不互報則血

脈不貫事體不均檢照常平令諸災傷縣計放兌七分  
以上監司各分州縣巡按檢察月具賑濟人口工料錢  
穀奏聞若當職官措置乖方內知州奏裁餘選官對移  
訖奏以監司附近地方言則建康府太平州廣德軍當  
責之安撫轉運使甯國府池徽州當責之提舉司饒信  
州南康軍當責之提刑司臣等方欲上聞忽准省劄備  
從提刑司所申行下臣某都運臣某提舉已遵稟外緣  
當來提刑司所申但及分任事理而未有通察互報之  
文兼所分州縣當職官措置善否推行勤惰及境內有

廣德州志

卷四十九

表疏

九

無流移死亡之民亦合許臣等將來分別奏聞以聽陛

下之賞罰伏乞睿照

准嘉定八年八月二十日省劄依  
已降指揮各行分管施行事件逐

司互相關報其州縣當職官奉行濟糶勤惰仰監司  
各照所管州軍當職官具職位姓名申取朝廷指揮

申尙書省乞再撥太平廣德濟糶米

案萬曆志止錄  
其一米字下謬

添第一  
狀三字

照對昨蒙朝廷支撥米三十萬石專委江淮制置司契勘  
本路所部州縣災傷輕重將所撥米并提舉司所管常平  
義倉米及用度牒收糶米并制置司所糶米并爲總數斟  
酌分撥赴各州軍應副濟糶使用仍行下分管監司將撥

定米斛督責州縣措置賑卹且許其向後闕少續具申請  
所有建康府太平州廣德軍三郡係准朝旨令安撫轉運  
司分管措置內建康府承制置司撥到米一十三萬石并  
義倉米三萬七千九百七石四斗有奇本府見行委官抄  
劄戶口候新制置李殿撰到日區處施行外太平州撥到  
米一萬五千石并義倉米二萬三千八百五石六斗有奇  
廣德軍撥到米三萬五千石并義倉米一萬三千六石八  
斗有奇近據兩郡申到抄劄戶口賑目及自目下至來年  
春夏之交合用濟糶米數太平州三縣丙戶一萬七千九

百九十有五丁戶四萬七千七百有九戊戶一千八百通  
計四十一萬五千七十一口除已撥到米數外尙欠米四  
十二萬一千六百餘石廣德軍二縣丙戶一萬九千七百  
四十有一丁戶三萬二千八百二十有四戊戶二千五百  
有八通計二十三萬九千三百二十一口除已撥到米數  
外尙欠米三萬三千一百八十餘石若非再瀆公朝仰蘄  
終惠則將來賑卹必至不繼槻等實有辜芻牧之責今照  
得兩郡雖均係災傷地分然廣德被旱尤重兼本軍地素  
磽瘠民生孔艱豐年樂歲不免貧悴一遇水旱坐待流殍

而鄉村之民尤無聊賴自八月間已有饑餒至甚者非有司極力賑卹未易全活自丙戶以下皆當給濟惟城市則濟戊戶而糶丙丁所以糶戶至少而合濟人戶居十之八至如太平爲郡雖頗稱繁庶然年來已非昔比當此歉歲民間亦甚艱食但狼狽之狀未至如廣德之極故惟戊戶則全濟丙丁戶則糶內鄉村丁戶亦量行給濟所以濟差少而合糶人戶不啻倍蓰兩郡事體既稍不同其糶濟遲速亦不容不稍異廣德已自十月十二日爲始太平州則以十一月十一日爲始所據兩郡申到欠少米數並是

廣德州志

卷四十九

表疏

十一

的實太平所欠雖止是糶米然爲數不貲不敢盡以上累朝廷除已從轉運司那撥米斛并督責本州守令多方指置勸分招糶貼助賑糶外今來止敢以五分之一控告公朝特賜劄下建康府轉般倉支撥米八萬四千石應副太平州賑糶其糶到錢槻等專一任責拘還朝廷不敢分文違欠所有廣德軍尚欠米三萬三千一百石係指定合用之數委是無從措畫併乞劄下平江府百萬倉照數全賜支撥以充接續賑濟庶使兩郡饑民獲脫溝壑實出始終生成之賜伏乞指揮

十二月二十六日奉聖旨建康府轉般倉於椿管米內支撥五萬石付

太平州充賑糶及令浙西提刑司於平江府百萬倉椿管米內支撥二萬石付廣德軍充濟糶使用糶到價錢各就本處令項椿管具入月賑供申其米仰逐處徑自差辦人船前去般取仍仰開具收到錢數申尚書省

申尚書省乞再撥廣德軍賑濟米狀

同知軍  
軍即魏峴舊志

誤作第  
二狀

某等照對江東今歲旱蝗為諸路之最廣德兩縣災傷又為本路之最蓋本軍田土瘠薄雖上熟之年猶有艱食之慮況自春徂秋種不得下其為狼狽不言可知仰賴聖朝哀愍元元賜轉般米三萬五千石及就撥義倉米一萬二千餘石醴恩博施自昔所無某等與兩縣十四鄉之人同

廣德州志

卷四十九

表疏

十二

深感戴第此邦民貧特甚昨本路諸州抄劄戶口皆以五等為別其他州縣惟丁戌始濟獨廣德兩縣所謂丙者殆不及他郡之丁饑寒窮窶往往相似故自丙至戊無非當濟之家總而計之仰哺於官者凡二十三萬九千三百餘口其流移新到旋次抄入者又不在此數臣等自九月間已聞兩縣管下鄉村有飢餓垂盡之人亟出義倉米賑給一次計一千六百餘石又于十月十二日以後將丙丁戊戶普行賑濟計用米一萬七千餘石及某巡歷到軍經行田野訪問父老皆言自昨賑濟之後又閱兩月餘貧民下

戶復以闕食遂與潯同共商議以今月十八日爲始再將丙丁戊普行賑濟計用米一萬七千七百餘石通將三項共計支過米三萬六千餘石某等亦竊自念今歲饑荒非止一州一路朝廷至仁徧覆有請輒應爲力甚艱某等忝在臣子當知體國故於撥賜之米愛惜惟謹專畱以充賑濟其軍城附郭合用賑糶米九千餘石皆從轉運司撥官錢收糶而戊戶計口給濟爲費尤多不敢悉用官廩以一月爲率兩旬以米一旬以錢米出於官而錢則出於某之私帑區區之意本欲存畱斗斛以接續賑濟庶免數恩朝

廣德州志

卷四十九

表疏

十三

廷其如戶口至冬除三次給濟計支過米三萬六千餘石所餘亦已不多自開春以後至於四月尚須三次給濟用米至多近者安撫轉運司嘗具申請乞於平江百萬倉支撥米三萬三千一百石委係指定之數日夕俟命未准回降今來事勢迫切某等職在賑恤實不遑安用敢合辭控告造化伏望朝廷檢照安撫轉運司已申事理早賜劄下平江百萬倉照數撥降施行某等實與斯民同霑大賜須至申聞者

申省第二狀

此係第一請被受省劄不允後再具申在三月初發

案

此在嘉定九年下同

照對某近申朝廷乞賜指揮將所撥平江府百萬倉米三萬石付廣德軍專充賑濟免令拘收價錢續准省劄未賜允俞某恭承朝廷之嚴卽當稟聽豈應再三煩瀆自速斧鉞之誅竊念廣德歲災傷害最爲酷烈環地千里粒米不收人情憂搖皆謂必填溝壑某自去秋被命措置卽行下本軍差官抄劄其間所委或非其人不無泛濫而合濟之家卻多遺落某亟遴選強敏愛民之官精加覈實釐正甚多又於給散之日令民戶結申互相保委其有冒濫許入

廣德州志

卷四十九

表疏

十四

告陳緣此有已抄劄而不敢請由有已得由而不敢請米有以三口爲五口而自行首實有以一家得二由而復行繳還冒濫之弊委已盡革其實貧乏者卻與抄入凡今所濟盡是闕食之民卽不敢分毫泛濫有失聖朝子惠困窮之意兼某區區愚鄙嘗竊有見以爲當天患民病之時必須上下同心竭力以圖拯拯迺克有濟故凡朝廷所賜一勺一合盡以充賑濟之用其軍城并屬縣自冬至夏合用賑糶米斛皆從本司措置應副不敢於濟米內分撥又賑濟錢米或有不給亦不敢一切倚辦公上前後出備添貼

其數甚多蓋職所當爲自當罄竭豈敢數恩朝廷今來所乞將百萬倉米二萬石專充賑濟實緣事不獲已方有此請蓋上項米斛原係陳乞爲賑濟之用若以其半畱充出糶則三月間一濟欠米萬石本軍旣無事力本司帑廩又空四顧徬徨實無從出闔郡數十萬生靈之命已蒙全活至今農事方興仰食尤急若賑恤不繼則前功盡捐一簣之虧誠爲可惜伏望鈞慈俯察誠悃特從前請將所撥百萬倉米二萬石付廣德軍盡數給濟免令出糶收錢某與斯民均被隆天厚地之賜伏候指揮

廣德州志

卷四十九

表疏

十五

申省第三狀

三月二十二日發  
案舊志誤作第四狀

照對某近者再申尚書省乞將平江府百萬倉撥到米二萬石付廣德軍並充賑濟免令出糶拘收價錢側聽兼旬未拜俞旨伏緣本軍已擇定四月一日給濟除上件米斛外別無指擬祇得再殫愚悃上冒崇威竊見廣德去歲災傷荷朝廷恩恤備至昨者制司分撥米斛本軍所得凡五萬五千餘石以每石三貫爲率計錢十六萬貫有奇尙蒙盡數予民未嘗責令出糶今百萬倉所撥凡二萬石若以其半出糶止計錢三萬緡以聖君賢相切於愛民之心旣

嘗捐十六七萬貫救之於前豈復惜此三萬緡不以濟之  
於後況某原爲本軍再乞濟米三萬石繼蒙指揮止與二  
萬不敢數瀆朝聽已于本司經常支遣米內撥五千石添  
貼支散若使止須賑糶則本司所出之米豈不欲拘回價  
錢以助漕濟之乏實以本軍民貧非他處比惟城市人戶  
粗有生業可以糶濟兼行至於鄉村之民狼狽殊甚非濟  
不可故雖本司事力至狹亦未免徑行給予不復出糶收  
錢況於朝廷仁同天覆苟可保全民命必不計析毫釐今  
雨暘以時二麥甚茂田野父老皆言只待麥熟便可無憂

廣德州志

卷四十九

表疏

十六

但今歲氣候稍遲麥熟須至五月自今一濟正是緊切之  
時伏望鈞慈俯垂矜察許將上件米斛盡行給與貧民則  
天地生成之恩何以逾此須至申聞者

四月三十日劄檢  
會嘉定八年十二

月二十二日指揮支撥百萬倉米二萬石江淮制置司均  
撥本軍義倉米一萬三千六百石八斗一升又撥建康轉般  
倉米三萬五千石照得廣德軍撥降救荒米斛不爲不多  
本軍自合斟酌分撥濟糶庶幾實惠及民今據本軍具到  
十一月十二月分糶濟米數計其濟米支二萬二千八百  
一十二石三斗二分糶米止計一千五十七石六斗八升  
其濟米比賑糶幾過二十餘倍切恐惠及不及民利歸吏輩  
今來所乞改賑糶米二萬石作賑濟難從所乞此乃都司  
擬筆劄付本司四月十二日到司

申省第四狀

四月朔十日在廣德軍發四月二日  
省劄猶未到案舊志誤作第五狀

照對某昨嘗累申朝省乞將平江府百萬倉撥到米二萬石付廣德軍專充賑濟免行出糶朝夕延頸未拜俞音欽惟聖君賢相勤求民瘼由已隱憂自旱蝗以來賑廩捐帑不可勝計而廣德一郡得米凡數萬石並係撥充賑濟仰見清朝以民命爲重雖邱山之費無所愛惜何獨於此萬石必欲令其出糶收錢某雖至愚亦知非出君相之意日者側聞士大夫有好爲議論者以爲此郡災傷本不至甚官司賑恤失之太優斯言流聞遂致上誤朝聽某竊謂欲知災傷之重輕當觀檢放之多寡欲知民食之艱否當觀

米價之低昂本郡秋苗已蒙詔旨盡放則災傷之重固不待言今去麥熟無幾而城市米價每一省升爲錢四十餘足則民食之艱又可概見或者徒見境無流離野無餓莩遂以災傷爲本輕賑恤爲太厚殊不知去歲秋冬之間人情皇皇朝不保夕倘非至仁亟加拯拯則溝中之瘠已不勝其眾矣況自冬及春雖履行給濟計其所予實亦無幾蓋本郡當濟之家爲口幾二十萬而前後散米不過六萬石有奇民間所得雖微然不勞經營坐獲升斗和以菜茹雜以糟糠衍爲數日故能保全性命以至於今然其困窮

憔悴之狀見於面目者在在皆是蓋官司給濟僅能免其餒死而生生之業固已赤立無餘且城市居民粗有營運本司出米賑糶其價又爲甚輕尙有自旦至暮無錢可糶者本司糶價每升二十四文足有納二十文而乞減四文米者某巡歷此來目擊斯事遂將軍城縣市仰糶之戶普濟一次丙七日丁十日而痛減官糶之直每升爲一十八文況於田野鄉村尤爲岑寂若改濟爲糶其間無錢可糶者十室而九未免卻以由歷轉售於有力之家饑腸勿充坐以待斃是朝廷不惜屢濟以生全之而顧惜一濟以棄絕之也況今大麥已穞而未黃小麥

方秀而未實民食之乏正在斯時給濟之期不容少緩契勘百萬倉米除前一濟八千石外目今所存一萬二千石見分撥軍城并四安倉椿頓今此一濟係是結局視前當稍加厚會約用米二萬餘石本司事力雖微亦已那撥米六千餘石錢二千餘貫添湊外須至盡將百萬倉米充數方了給散一次竊見漢之汲黯事武帝雄猜之主其奉使以出又緣他故猶能便宜發廩以賑饑民然後歸節以請矯制之罪今某幸遇仁明寬大之朝且嘗承詔措置荒政親見民窮如此顧乃便文自營苟逃譴責非惟有愧昔人

豈不仰辜朝寄用敢不避誅斥謹同知軍魏承議以此月十日爲始一面開倉賑給外伏望鈞慈檢照某累申事理速賜指揮行下所有某不俟回降專輒給散之罪併乞重賜鐫表施行須至申聞者

奏爲不合差廣德軍教授措置荒政自劾狀

六月十一日上

臣今月初十日據廣德軍申知軍魏峴奏教授林庠不職奉聖旨放罷臣伏見庠之爲人素自修飭其掌學政又皆可觀峴遽劾聞深可驚駭蓋緣與聞荒政有若越職侵官臣而不言誰與言者竊惟去歲廣德之旱甚於他郡幸蒙

廣德州志

卷四十九

表疏

十九

聖恩優賜廩粟明詔帥臣監司分行措置臣與權帥胡槻共議以爲此郡之民凋瘵爲甚賑濟之責固在守貳商榷攸助不可無人博採羣言皆謂本軍教授林庠誠實懇到有志及民遂委之同共講畫庠以職在教導陳誼力辭臣非不知教官自有職分不當與聞民事實緣本軍官僚別無可委兼民命危急不應拘牽常法坐視而不知救強之再三庠始任責朝夕盡瘁區畫有方遂使千里赤子均被朝廷賑恤之實惠桐川之人悉能言之臣方賴庠得以逃責而庠乃用是以獲罪蓋尋常州縣救荒只欲自專其事

侵牟移易惟所欲爲朝廷監司莫可究詰庠旣同共措置自太守以下雖欲爲欺終有掣肘庠之召怨實基於此胥吏乘峴未至已有熒惑之言臣行部到軍有宗室寄居論本軍民病十事臣之望峴不薄出以示之且謂此邦同官惟教授可與講究共起斯民深錮之疾本是美意不虞峴反疑庠以此告臣懼其旁觀不得自肆峴之忌庠自此而深臣昨用官錢兌提舉司和糴米四千餘石椿畱在軍接續賑糴峴以郡計窘乏漫無措畫乃垂涎此米欲掩有之遣吏勇桴傳道指意諷令作出剩獻納庠具陳其不可峴

廣德州志

卷四十九

表疏

二十

之怒庠至是益甚臣雖未見峴章采諸道塗咸謂劾庠之疏緣此而上峴雖庸駿甯不稍知是非何至率然妄發蓋以廣德弊壞未易支吾故爲脫去之計以圖善地情狀本末暴之天下自有公論重惟陛下不鄙臣愚使分一道按察之寄別白善否其責在臣今庠乃以宣力救荒橫遭媚疾臣甯冒昧一言同受譴責無甯畏罪泯默上負聖主下慚物議是以千犯宸嚴具陳事實伏望聖明察庠居官本無他過致其出位咎皆由臣庠旣罷黜於臣之義尤難苟免欲乞明詔有司議臣之辜并賜鐫斥施行須至奏聞者

并申尚書省御史臺諫院

第二奏乞待臯

六月十四日 上

臣近據廣德軍申守臣魏峴按奏教授林庠不職得旨放  
罷臣已具奏本末乞將臣併賜鐫斥以懲差委失當之臯  
及庠申到峴章取而讀之則意不在庠專爲臣發震悸累  
日無地自容臣以疲憊謬當荒政之任若謂其識見庸闇  
委任非人措置乖疎周防不盡竊自揣量誠恐未免以此  
加臯臣何敢辭顧峴所陳事關堂陛臣書生爲吏乃千名  
教之誅可無一言再瀆天聽伏念臣自去歲旱蝗以來朝

廣德州志

卷四十九

表疏

二十一

夕憂懼訪求疾苦不憚馳驅區區此心唯知救生靈所以  
固邦本布德意所以尊朝廷曷嘗一毫自爲已計昨蒙聖  
恩再賜民粟卽勒手榜徧諭田里使知獲免饑餓流移之  
苦盡出聖上仁恩一飲一食宜知感戴蓋赤子朝廷之赤  
子錢穀朝廷之錢穀人臣於此得效尺寸實藉朝廷事力  
就使推行盡善皆是職所當爲以此言勞稍知義理之人  
亦所不敢昨者累申朝省乞將賑糶米改充給濟實緣春  
夏之交青黃未接官糶雖平而城市居民尚苦無錢可糶  
村野窮僻困悴尤甚陛下至仁旣嘗斥四五萬石以活饑

貧顧此萬斛聖朝豈復靳惜輒緣至意捐以予民私謂推廣上恩縱令獲罪不過薄責若早知此舉涉尾大衡決之嫌則臣雖至愚焉敢犯此大戾竊觀祖宗朝范鎮在陳范純仁在慶皆嘗以便宜發粟不俟奏報而朝廷未嘗不尊堂陛未嘗不嚴當時羣賢滿朝亦未聞有慮其啟專橫之漸者今臣先請後發其視二臣尤非專輒況不旋踵而報可之命下是陛下固以亮臣之心而赦臣之罪朝廷之上亦舉無異論矣峴爲郡守乃獨追尤前日予民之不當是併陛下之赦臣者亦非也況其始議之時庠與一二同僚

皆主賑貸獨峴移書告臣力言給濟之便及臣到郡又愆懇再三謂民窮如此非徐行拯溺之時且令所親作詩勉臣以汲黯之舉自始至末峴皆與謀故臣申省狀云謹同知軍魏承議開倉賑給若峴不與聞臣敢妄爲此言乎今乃加臣以不有朝廷之辜是無天也兼臣從來巡歷先期戒約官吏每送迎毋排辦所至蕭然人所共覩比者往來桐川雖巡尉職當警護亦令勿出唯將入郡城見市井小民執旗迎候者頗眾臣方訝其無錢糴米安得有錢製旗亟諭之散去已而物色乃知峴用公庫錢製造以給之又

出絹與民繪像欲爲臣立祠於學且屬庠撰述碑文幸庠力辭而止臣繼聞之卽移文禁戢明言全活生靈出自朝廷之賜凡百官僚止是奉行有何功德可以當此令其日下除撤向使庠率爾承命其爲奇貨亦又甚焉臣性疎直待人不疑見其外若溫柔謂可與之爲善慨念本軍積弊已極方約其同心講究以蘇民瘼不謂其意薄陋邦潛圖脫去已設機穽於出肝肺接殷勤之初柔邪之類其不可測如此臣非不知久去闕廷孤危易撼見幾不早尙口乃窮然念微臣事君粗有本末上賴仁聖保全至今就令奉

廣德州志

卷四十九

表疏

二十三

使失職朝廷自有黜典臺諫自有公論而屬郡如一魏峴得相陵蔑誼當自反何敢辨明知如峴所陳既有扶持名教之深慮則臣之所坐宜得覆載不容之大僂峴去臣畱尤所未安欲望聖慈明詔有司審覈虛實倘峴言有狀卽乞將臣重賜敗竄施行臣見今待臯外伏候勅旨

六月二十一日

奉聖旨眞某無臯可待魏峴與宮觀二十三日出省劄二十八日到司尙書省送到承議郎權發遣廣德軍魏峴奏臣猥以孱庸游蒙器使由州別駕三遷遂玷班行旋叨外除分以左符云云學校者清議之出而博士者諸侯所專今乃乘時邀權見謂越職臣而緘默公論謂何竊照軍學教授林庠璧水諸生高甲賜第本軍雖號偏壘臣方喜教養之得人使不以利達動其心靖共自愛則國家爵祿他時決非爲庠惜者奈何甘心猥冗求媚取榮臣到軍以來

但見其終日坐廩倉中以師道之嚴而本職則親置官之職  
糠粃敷簸塵埃僕緣庠處之不自安而本職則委他官通攝  
臣已竊鄙之矣當去歲近又續撥降米二萬斛付本軍發  
廩給濟饑民德至渥也漕臣親筆上項大畧謂若未准請  
乞盡行賑濟也未幾又以漕臣汲長孺之舉臣遂致言漕臣  
州回降非晚行部前來欲為父孺之前俟成命之頒臣  
謂所當披瀝肝膽控告於君父之前以俟成命之頒臣  
意蓋欲恭聽陛下處分也繼而漕臣循行於一軍皆  
里之欲一日當畫庠於郵筒中雙黃旗腰鈴走傳一軍皆  
驚發觀乃一批與都吏言漕臣入軍境怪逆之不來庠  
推廣其說令都吏意居多造軍旗帥眾迎且令排  
門備辦香燈設以供漕臣此而指意下形小民德之民此復  
何時安得有錢可以為勢所迫遂各捐金以給之復以書  
日疲頓臣不忍見其為後邀臣同銜具申繼而見庠  
抵臣言漕司將米給散之勢所迫遂各捐金以給之復以書  
又復謂臣庠與漕司言若與臣同銜具申繼而見庠  
采抑不思米陛下之民與臣同銜具申繼而見庠

廣德州志

卷四十九

表疏

一二十四

使斯民知被陛下之德尚何較其精采與否耶則庠之銳  
意縱諛明矣臣未敢往報可先濟是知其權已怨不與也  
庠於其中乃分撥往建平縣出糶收錢今陛下以二萬斛  
濟糶於民乃不候報之矣以濟是知其權已怨不與也  
不以糶也一庠足辦之矣以濟是知其權已怨不與也  
美欲掠於一身必及於他人不濫事庠臣委何所恃而敢爾  
近據人戶解四一等陳訴濟米濫事庠臣委何所恃而敢爾  
支離其說除陳廣壽漕臣訟意果安在兼於庠怙勢憑陵嘗謂  
臣甯國新除陳廣壽漕臣訟意果安在兼於庠怙勢憑陵嘗謂  
臣也如廣德縣申乞差更官檢屍何預焉乃對臣按服肆  
言所差之官不當必欲更而後已軍學有兵逃服乃  
不候根捉即以其素所更而後已軍學有兵逃服乃  
縷瀆宸聽事繫紀綱甯容但已望聖慈特發斷將一  
亟從罷斥以爲輕小貼子臣滅裂軍壘怨者戒於國勢誠  
非小補伏候勅旨小貼子臣滅裂軍壘怨者戒於國勢誠  
乞引嫌回避欲望聖慈矜憐小臣特賜兩易一軍壘或  
待次差遣保全孤蹤不勝大願俟勅旨兩易一軍壘或

聖旨翰林庠放罷魏峴授別林庠一等軍壘差遣李提舉因奏爲  
廣德知軍魏峴按教授林庠實按轉運副使眞某峴別軍學教授林  
辨明事且臣竊覩進奏院報知廣德軍峴按軍學教授林  
庠不法遣臣非當竊謂峴副使眞某峴之按民饑困欲捨職而任荒  
軍壘差遣臣非當竊謂峴副使眞某峴之按民饑困欲捨職而任荒  
則眞是眞非按庠乃按某也峴者必有一峴之按民饑困欲捨職而任荒  
所聞峴臣非按庠乃按某也峴者必有一峴之按民饑困欲捨職而任荒  
政挾漕臣而陵郡守夫以一峴之按民饑困欲捨職而任荒  
廩粟以活之仕乎此邦者任其事如救焚拯溺何常出  
可拘當此之時軍學堂試爲重乎本軍賑濟爲重乎出  
濟物固儒者事峴昧於輕重而不可以庠終日坐倉爲鄙  
則陋矣至如設使忽郡將則臣重也況峴於庠者果何哉以  
守爲屈已從之未可以語忽禮節也況峴於庠者果何哉以  
亦當屈已從之未可以語忽禮節也況峴於庠者果何哉以  
言禮節悖慢之實則峴有深怨極憾於庠者果何哉以  
此言與峴比肩事主某雖任按察若峴爲是乎善峴不肯苟徇  
具以上聞孰日不可然臣不知果峴爲是乎善峴不肯苟徇

廣德州志

卷四十九

表疏

二十五

之奏爲荒政言也若日某縣流移者多而不能止某鄉  
死者衆而不能救某處給散濟米之有欺某邑糶錢出入  
之不明某事則何人逃罪而某條則有日之案無所指其  
實而之某事則何人逃罪而某條則有日之案無所指其  
其責矣臣竊聞峴之奏千餘言畧不爲是乎特以輕易乎朝  
自專掠美爲某罪陛下試覈其實峴爲是乎特以輕易乎朝  
自專固人臣之罪而許以從宜者乃人主之大權掠美固  
君子所羞而爲君任怨者尤未世之邪說如峴所陳陛下  
欲濟而易之糶非陛下欲糶而難之竊謂爲有司專擅  
之罪廣德糶糶非陛下欲糶而難之竊謂爲有司專擅  
輸不齊糶米未至而借濟米以應之然竊謂爲有司專擅  
以益之權宜集事要厥成終文籍具存自無混淆若糶米  
不過如此則固亦陛下所許事也子職無他任其美  
之說則又不可不察臣事君猶子事父也子職無他任其美  
父之事而已臣職無他任其君之事而已故稱人子之善  
者必歸美於其父稱人臣之善者必歸美於其君擢是善  
任是職欲其於職而人善之乎欲其於職而人怨之乎  
使人臣任怨於下則人善之乎欲其於職而人怨之乎

主何利焉且岷固言之矣米陛下之臣奉陛下之民也獨  
不日臣亦陛下之民何往而非陛下之德澤哉天下未嘗有  
無實之名也臣之事君當責其實而求名與否不必問也  
若夫黎民阻飢上所當恤此則如慈母之乳其子初不爲  
名饑而不得食則怨既得食矣又何怨萃於上之有乎岷  
之言無足辯者然臣竊見近日風俗日以衰弊人臣率顧  
之一身利害之行私而不以國家生民爲念臣雖不肖每獨憂  
文自營誰任陛下事者岷言雖小所關甚大此臣拳拳之  
愚所以營瀆天聽不自知其煩也岷與某一大非必有  
公論伏望陛下特選朝士或委鄰路監司覈考其實若廣  
德荒政不舉則某爲負陛下委鄰路無責若岷言無實則  
是非私意邪說上惑朝聽亦乞明正其罪使天下知是  
復避嫌且岷尚居部內在臣職所當言敢冒犯以聞取進  
止又上丞相手書道仰恃隆寬輒有白事道傳竊見廣

廣德州志

卷四十九

表疏

二十六

德魏守按罷教授林庠卷傳其劾章至此者詳觀之實乃  
按眞漕也某竊惟去年蒙朝廷撥米賑濟自江東言之廣  
德爲最優且如池州太平甯府等處若戶口及所  
得米數言之皆差不優於廣德蓋緣廣德之民自來貧困  
雖遇樂歲亦不聊生去年之旱又爲特甚所以再置司仰  
體朝廷之意優數撥米然猶患其不足故漕司再有所乞  
又申明易糶爲濟然後一乃朝廷之得免死司不過奉朝  
之至德丞相之至恩也米之因多非所得罪反但聞數  
之命給散之耳魏守所以奏之散米多罪反但聞數  
戴君相恩德之民變爲疑貳之言是魏守本謂眞漕市恩  
以歸怨於上而不民知今日之貳乃所以爲歸怨之舉也某  
不能自已輒上其事區區仰荷詳察施行以一毫朋比眞漕  
之望干冒威尊下情皇恐之至袁祭酒相書疑以慰  
民庸伏蒙公朝過有推擇之居成均導之職無補秋毫  
疎庸伏蒙公朝過有推擇之居成均導之職無補秋毫  
每深自媿伏覩國典著令於一郡者固長也今廣德舉  
則某所領之職與典著令於一郡者固長也今廣德舉

官林庠爲郡守劾奏遂致罷黜某不敢不爲一言竊惟自古設官雖各有司存而亦有罷黜可以相通者且司徒掌教從古以然故周禮大司徒之職曰因此五物者民之常而施十有二教焉又曰以荒政十有二聚萬民夫以掌教之官而兼領荒政何也蓋愛養斯民各安其所而後教化可得而行也叢爾校官與司徒固相絕然預聞荒政頗亦似之某所謂可以相通者蓋如此今所在教官不遵法度樂之集預者強半爲守臣者未聞有所按發而畱意於救荒者獨以提學爲職曰侵官不猶愈於預妓樂者乎江東漕臣既以提學爲職知林庠平時有學道愛人之志故以是委之亦未爲過若逐其所委則何以自安幸而一朝廷清明守臣教官一時並罷可謂公平矣但守臣別與一朝廷差遣而敎官竟罷猶恐無以安漕臣之心此亦公朝所宜審處也乙亥之旱桐川爲甚而民又最貧故某所分二州尤審加意於此郡汲汲拯救如捍頭目控愬於朝得米凡五萬餘石皆捐以濟民而未嘗責之出糶千里民命賴以保全者二十餘萬聖朝配天之澤可謂博矣迨丙子春乃有爲諛詞以欺廟堂謂江東諸郡實不甚旱傷監司好名故張皇

廣德州志

卷四十九

表疏

二十七

其事且指民無流莠爲旱災本輕之証於是當路不能亡惑而申請遂落落矣三月末某再巡歷至桐川是時民饑困者甚眾所請萬石屢爲都司駁下遂不護已與郡守魏峴議先發廩以濟民然後申乞俟臯都司有不樂者於是喉峴劾其所委之官以自解而孤跡遂岌岌矣幸朝廷清明察峴之姦而以某爲無罪迄免吏議天覆地載恩施無窮未知報塞之魏峴詆誣之章與某自劾二狀袁李世子孫毋忘上賜其魏峴詆誣之章與某自劾二狀袁李世子孫具列於此者

爲賑濟無罪可待謝表

臣某言昨以知廣德軍魏峴奏臣將賑糶米擅行給濟臣尋具奏聞待罪外恭準尙書劄子三省同奉聖旨眞某無罪可待魏峴與宮觀臣除已卽時望闕遙謝訖者囊封引

咎甘竦竄投詔旨疏恩遽從原賞驚魂甫定感涕交流臣  
某誠惶誠懼頓首頓首伏念臣猥以孤生寔塵華貫雖無  
他技可自詭於事功獨有此心常愿忠於君父頃玷諮訊  
之寄適罹旱暵之菑一道生靈命方危於絲髮九重宵旰  
痛若切於體膚蒙賑贍之有加懼奉行之弗稱惟此年之  
通患眡荒政爲具文昔嘗竊歎於里閭今忍自欺於天日  
懇誠一念不啻已憂纖悉百爲幾如家事官僚惟其可用  
復何常職之拘德意有所當宣遑卹小嫌之避方桐川之  
再至適麥壠之未秋罄罄眾口之告饑翼翼累章之瀝懇

廣德州志

卷四十九

表疏

二十八

雖尙稽承詔臣子不得而專然苟可活民仁聖必無所愛  
遠稽汲黯河內之故事近考范鎮宛邱之已行輒頒給而  
後聞果俞允之亟下豈料屬城之守迺騰罔上之章謂人  
臣之罪無甚於擅權而天下之惡孰踰於方命始共成其  
過舉終反中以深文借前古尾大之言實微臣族赤之地  
縱日月照臨之下靡隱弗昭顧風波震蕩之衝何恃不恐  
亟申辜顛仰瀆聰聽在漢法之當誅幸堯仁之垂宥茲蓋  
恭遇皇帝陛下澤流遠邇識洞忠邪知臣分求牧之憂誼  
難安視察臣有放麀之故意實無他特恢含垢之恩稍正

聖讒之典以伸輿議以厚邦風臣敢不祇載鴻私勉殫驚

頓使殺身有益尚肩一節以報君況為善無傷敢替初心

之及物謝宰執啟巧語上聞極抗章而自列隆恩下逮迄

敏徒抱澗疎入侍軒墀每見玉色憂民之切出乘輅傳伏

觀璽書邨下之頻誓竭驚材祇承德意屬江左並罹於旱

燠而桐川尤極於凋殘蒙賑贍之特優懼奉行之弗稱夙

宵一念民饑奚異於已饑區畫百為王事殆同於家事所

冀推仁恩而均被靡違顧文法以自營頃當原隰驅馳之

時備睹田野焦熬之實欲糶則人告青蚨之乏欲濟則官

無紅腐之儲抑立視其死與既職以偷安甯若捐身而任

責勉効便宜之舉亟蒙開可之音顧小民敢越於拘攣見

盛世素存於寬大是乃彰朝廷之美何至于堂陛之嚴以

王命而賙民艱本其所職貪天功而為己力焉有此心豈

虞止棘之讒乃出部符之職貪天功而為己力焉有此心豈

廣德州志

卷四十九

表疏

二十九

語言妄發而不倫本無足辯荷天日照臨之赫免風波淪  
陷之危茲蓋伏遇某官以至公而秉化鈞以深仁而培邦  
本謂羣臣之善亦王之善齊人嘗有格言而眾職之功乃  
相之功柳子誠為確論凡悉力以裨荒政即盡忠以報公  
朝肯令譖愬之行馴至是非之易位特加全護俾道讒  
呵某敢不仰佩鴻私益堅素守放麈何臯既蒙觀過之恩  
蹈虎雖危當勵匪躬之節其為銘篆曷既編摩

案真西山德行文章為宋一代偉人而措置荒政有

功於廣德者最大當日奏牘具在剴切周詳讀者咸

知感動况親被其澤者乎萬厯志止載乞濟糶米一

篇固屬掛漏楊門等志僅增其四亦為未備夫其苦

口乞濟不憚煩瀆者祇欲活一郡之民耳且因是幾

獲重罪生是郡者但食舊德而未詳考其本末何由  
知仁人君子之用心哉故凡文集中有涉廣德者一  
并錄入以誌百世不忘之意兼以示勸非徒尙博也

